

вран на мярищи <забдех>; и разсыпаса живот мой, аки Ханаонийски царь буйством; и покрыла мя нищета, аки Чермное море Фараона.

5. Еже бо написах, беже от птица художе(л. 252 об.)ства моего, аки Агарь рабыни от Сарры госпожи своея.

6. Но видех, господине, твое добросердие к себе и прийти ко обычной твоей любви. Глаголет бо в писании: просящему у тебе дай, толкушему отверзи, да не лишен будещи царства небеснаго; писано бо есть: возверзи на господа печаль свою, и той ты препитает во веки.

7. Аз бо есми, княже господине, аки <трава> влещея, на застене растяще, на нюже ни соньце сияет, ни дождь снидет; тако и аз всеми обидим есмь, зане огражаем есмь страхом грозы твоея (л. 253), аки плот<sup>1</sup> твердым.

8. Но не возри на мя, господине, аки волк на ягня, но возри на мя, аки мати на свое младенца. И возри на птица небесныя, яко, ни сеют, ни орут, ни жнут, но уповают на милость божию; та и мы, господине, желаем милости твоея.

9. Зане, кому Боголюбиво, а мне горе лютое; кому Белое езеро, а мне чернее смолы; кому веселое езеро, а мне на нем же плач горкий; кому есть Новгород, а мне и углы отпали и огнили, зане <не> процвете часть <моя>.

10. Друзи же мои и ближнии и тии отвергошася мене <зане не> поста(л. 253 об.)вих пред ними трапезы многоразличных брашен. Много бо дружбы имеют со мною, подгнетающе руку <со мною> в солило, а при напасти аки враги обретаются и паки помогаю<sup>2</sup> подражают врази мои; очимо плачут со мною, а сердцем смеют ми ся. Им же не ими другу веры и не надейся на брата.

11. Не во лжу бо ми глаголет Растислав князь; лутче бы ми смерть, нежели Курбьскаго княжения; тако же и мужеви; лутче смерть неже продолжен живот в нищете (л. 254). Яко же рече Соломан: ни богатства, ни убожества не дам ти: аще будещи богат, то гордость возприимещи; аще будещи убог, то помышляю на татьбу и на разбой, а жене на блуд.

12. Тем же вопию к тебе, одержим нищетою: помилуй мя, сыне великаго князя Владимера, да не восплачюся рыдая, аки Адам лишен рая; да пустит мя на землю художия моего.

<sup>1</sup> После слова „плот“ оставлено место для 3—4 букв.

<sup>2</sup> Слово „помогаю(ще)“ приписано со сноскою на поле: оно при переплете было обрезано и за буквой „ю“ видна только одна палочка от следующей буквы — вероятно „щ“.